

乾  
隆  
鄞  
縣  
志

鄞縣志卷十八

孝義

富貴而名磨滅者多矣鄉曲之士內行克敦不求名而名自歸之

聖人在上表厥宅里以示獎勵載筆者其可遺乎或謂割股非孝然則宏演納肝金藏剖心皆可以毀傷遺體責之矣後儒哆談節義義可以無死而死者且俎豆祀之割股之傷未即死也而轉不免於訾議所謂責於人終無已也故取楊慶諸人具列於篇

宋

楊慶性至孝父病貧不能召醫乃割股肉啖之良已其後母病不能食慶取右乳焚之以灰和藥進焉入口遂瘥久之乳復生宣和三年守樓異名其坊曰崇孝紹興七年守仇愈爲之請十二年詔表其門復之愈曰韓退之作鄴人對以毀傷肢體爲害義然匹夫單人身居草莽軌訓之理未宏汲引之徒多闕而行成於內情發自天使稍知詩書禮樂之訓推其所存出身事主臨難仗節豈減介之推安

金藏哉

宋史孝義傳

林曄字公著以孝謹稱性好施大觀間陳瓘謫居於鄞曄獨厚之後徙他所仍遣使問遺不絕建炎中州燬於兵曄未暇葺居舍首捐數十萬緡理學宮且輟田半頃爲養士

費太守吳懋嘗舉其事以諷示郡人後仕至韶州司戶寶慶志

方昌軫之孫事親篤孝母疾劇或告以人肉可療輒禱天  
割股和羹以進疾果瘳里人白於官昌沒爲之立祠後有  
以毀傷訾昌欲去其祠者黃震爲力辨乃止嘉靖志

童判子失其名家貧爲人典庫稱曰判子有姊早寡迎養  
於家承順不少違後其甥弗事產業累負債輒代爲償不  
以告姊王安石爲鄞令訪而得之接以賓禮江隣幾雜記及王深寧十

八賢贊

元

石孝子四明山農早喪父獨與母居一日以事出告其母

曰兒出母無待養者幸往依女氏待兒之歸其女氏去母家甚邇孝子謂母可卽至竟行後二日歸先過女氏迎母而母未嘗至心驚倉皇抵家見壁間一巨寶覘之則虎子三據其榻有餘血淋漓大慟盡殺虎子復磨一斧立竇內頃之虎母循竇入斫其首碎之取肝腦磔諸庭復大慟曰吾雖殺四虎母讎未足報也乃更跡牡虎所行路持斧阻崖石待之牡虎咆哮過崖下孝子奮前當虎首連斫數斧虎斃孝子亦死僵立不仆張兩目如生而手持斧堅不可奪鄉隣走視咸股栗獨嘗捕虎者相率拜祭而神之

戴良

石孝子傳

按石孝子亦見餘姚志作石明山以四明山綿亘

鄞餘姚之境故各引以爲重也戴九靈傳不書其名

華昭生未晬而父亡母沈氏貧不能自存父母欲奪其志誓死不可日紡績以字孤後疾亟傷無給侍昭尙幼能刻意茹素禱之弗瘥聞昔人有割股以救親者於是露禱於天割左股作糜和藥以進母食之果愈郡守許廣大爲書節孝字於門

成化志

唐轅字伯度弟轂字叔直其父復禮以官讎事被陷逮赴京轅詣吏請代不省至叩頭流血吏憫其誠遂脫父桎而桎之行至越轂適自杭歸遇諸塗挽轅衣袂哭曰兄冢嗣不可以死弟請代轅不從竟奪轅桎加已手吏亦憫而從

之抵京繫獄近臣有奏其非罪者例免以歸復禮有四子  
長卽轅次翰字仲規叔卽穀季輻字季齊先是九靈戴良  
嘗爲作四子字說至是復著轅穀二子傳

成化志

明

陳思禮字用和七歲父德祥沒母石氏守節自誓嚴督其  
子以學或稍懈卽對之泣曰汝父爲名儒吾所以忍死鞠  
育汝者冀有取法也奈何背之思禮卽惶懼若無所容由  
是肆力誦讀母年五十五疾卒被髮狂號曰吾母何在引  
刀欲自刺家人奪之解喻百方久而稍釋服闋入郡庠先  
是母爲擇婚石氏及二十四不娶曰娶婦爲養姑也失母  
焉用婦其師鍾士懋繩之急始成禮合卺後號泣七日夜

婦亦化而從之洪武六年貢入太學夙夜不忘其親扁其

室曰如在衍聖公孔希學作隸古書之

蜀志

許敬觀明州衛兵也事母至孝一日與同伍十人駕舟販鹽至江北渡忽暴風迅雷擊舟中人上泥塗皆震死敬觀昏絕默念我死母將誰依忽若有人援之去衆死所三丈許而甦雷火燎髮如禿人以爲孝行之報

嘉靖志

盧顯其父祥卿洪武初以家世職漕運承督造海運船已而船破運折坐侵漁逮獄將就戮顯詣闕泣訴曰督造雖係父名而侵漁實在顯顯當死其弟敬亦同詣闕訴曰兄顯佐父周旋運事造船之工敬獨掌之罪當坐敬上矜之遂兩釋焉祥卿後以賢良舉知四川彭水縣以註誤當謫



戊雲南顯復哀訴請代上曰真孝子也祥卿有子如此可

冠帶寧家

嘉靖志

夏道昌月湖漁人也幼孤奉母至謹所得魚擇巨者供母  
饌餘以資薪米母得膚癢疾申時輒發發則須沃以沸湯  
道昌每出克期于申時歸供湯沐無失候者遇令節必奉  
母出遊母倦行則負以往偶不愜意母齧其背卽長跪祈  
請怒解復負之行一日漁得巨鯉土人厚與之直堅弗與  
怒而相毆一老者怪問其故曰歸以進母袁尙寶忠徹聞  
而敬禮之歲時設酒饌躬執爵相勸酬有詔錫民孝弟力  
田者粟帛以母沒力辭弗受

嘉靖志

章和字致和永樂初徙江南閩右實京師和年十九爲庠

生父已沒念長兄督家政弟尙穉固請自行籍于大興縣受廛安定關內墾荒作圃藝蔬自給暇則教授生徒貲漸裕招從子繪紹從孫鎰至京師躬自訓讀皆爲授室繪鎰皆登進士紹舉鄉試人以爲篤行所致

李志

虞德全隱居好善家在縣西南四十里正統元年五月六日日午天忽雨花飛滿庭中其形若米其色如玉積深尺餘七日始化正統四年邑饑其子陸及玖各輸粟二千石助賑有司以聞詔賜敕二道旌爲義門時郡守鄭公珞親詣其閭乃名其鄉爲天花里復作詩以貽之

李志

嚴端字克正景泰五年進士累遷南京車駕司員外郎忤巨璫罷歸性至孝母年百四歲而沒歸養凡四十年昕夕

不離左右母有所欲無弗力致疾則終夜不寐百歲之辰  
端率孫曾長跪上壽綵衣白髮周旋堂上見者以爲有老

萊子之風

李志

虞謹字靜之少有至性就外傳讀詩至明發不寐有懷二  
人淚津津下楊守陳見而拍其首曰篤孝兒旣長迎顏承  
志惟謹成化中兄謙之以富民籍徙安定亡歸有司逮捕  
甚急父憐兄老命謹代之卽慨然赴安定就役守陳爲之  
請得免歸旣而父病痢醫禱備至夜則稽顙北斗求代顙  
爲墳赤及卒水漿不入口三日面黑如囚嘗念父好老氏  
日誦道德經誦已卽哭久之淚所漬處磚爲之泐喪竟懸  
像進食如生母病逝如其父遠內室非祭不相聚非疾不

入問如此者十五年體素肥及後哀毀骨立自號曰瘦齋  
有白鸚鵡來巢寢室馴若依人聞哭聲亦鳴鳴鳴里黨咸  
異之

嘉靖志兼采顧  
禮虞孝子傳

孫鏐字允廉母徐氏方娠六月父珂往商於陝既而鏐生  
父久客不返徐鞠且教之稍長日記千言年十六補弟子  
員領宏治二年鄉薦時年二十一其姑氏令俳優侑燕至  
教子尋親事乃大慟曰吾父何在卽治裝至陝西備歷艱  
險竟尋其父以歸

嘉靖志

倪割猪居前江東業豬猪母世受佛氏戒不食葷腥久之  
胃弱身羸臥疾十八年晨夕煮粥哺之垢癢則采藥草煎  
湯扶之浴如廁則藉溫軟物抱坐之每勸母食肉母不從

因求代爲茹素矢言而後許乃具肥甘供養每夜籲天叩首額成隱疹若巨珠然遠近召其獷猪者見其額輒咨嗟不已必多以錢粟酬之

嘉靖志

林桂字士英宏治九年貢於鄉訓導舒城金谿二學陞遼府右長史天性孝友嘗構亭以娛父植槐爲蔭槁而復生人以爲異兄華得危疾涕泣求醫果得異方而愈

嘉靖志

許瓏字廷璧少孤依母不暫離一日母擲竹誤中瓏暈地急抱持泣瓏稍蘇卽張目笑語曰兒故嚇母非真暈也及長母所欲必竭力以供家居茅山或入城向夜必攜一燈走三十里歸省嘗夜歸燈滅遇神火於道導之抵家平居恒言孔門以色養爲難此不假力不費貲直易耳平居

言動不苟室中有婢二十六而嫁仍處子也

嘉靖志

馬扁西城外傭也賃傭養母值時物初出不計直必市以進力不能常得鮮日爲人執役夜則漁以供饌母遭疾無以具醫藥則中夜顛天斷一小指煮湯飲母母遂愈人稱

爲馬孝子

李志

薛淋字文時學文於余本聞性命之旨事父魁能順之於道父多昆季而性強執或至紛競淋彌縫調護久皆誠睦母董被疾累年淋斯夕侍側值省試輒謝不往母卒三年不御酒肉不處內與弟治自相師友怡愉無間一女弟適李惟勤早寡無子淋憐恤倍至所居相去數里日必一往視更數年不衰字其孤女如己女云

聞志

鮑倫字孟彝甫七歲父疇遊學吳楚莫知所向母孫氏獨居撫倫稍長卽治賈養母得其歡心每朔望焚香哀籲願父子終相見如是二十年忽有老父自言慈谿人述其里居甚悉謂倫曰汝父曩與我客湖廣至漢陽東塢授徒贅婦生二女不幸死矣盍往歸其尸已而至慈谿遍訪老人不得乃如其言詣漢陽跡之皆符婦家疑有他故訟於縣不能決繫倫獄縣上府府上監司監司謂疑獄錄有刺血驗骸事親至墓所發棺命倫齧指血瀝之果入枯骨倫情得伸卽棺斂請歸葬許之監司乃慈谿顧瑛也老父殆神人其自言慈谿或有所寓云

李志

董淑字宗順父銓蚤卒遺腹生淑旣長就外傅歸則依母

膝作嬰兒戲以娛母讀書至夜中必伺母寢撫衾禱安煖始就枕疾則通夕侍牀側久弗懈湯藥餽粥必手煎事兄如父未食不敢食勞必先承出納必請命二姊俱有疾視之如母次姊羸須人乳則取妻乳并丐之隣婦袖小器飲姊日數往返以爲常嘗就省試聞兄子病輒委行李奔歸居常以不得表揚母節爲恨竟先母卒

李志

開宗時幼喪母奉父及繼母盡孝嘉靖中倭賊突至舉家竄避宗時扶父出遇賊脅取金錢不得拔刀欲殺其父宗時以身翼蔽泣求自代父得免宗時竟飲刃死家奴李三抱宗時幼子不忍去亦被賊割左耳併剗其面屢死屢甦

見者皆傷之

壽海編



邱緒字繼充諸生父鑑娶余氏側室黃氏生緒而見逐改適江東包氏稍長或語以母故輒歔歔年十五父卒事余甚篤余病承湯藥惟謹衣不解帶數月余垂沒命之曰我死汝無忘若母是時去黃改適已二十年杳不可跡夢人告之曰汝母在台州金鰲寺前次日入城遇一人問之則故包氏廝也問以母所適廝亦不知請歸質之母乃知別適台州李憲嗣之子卽往之台則李已沒無後仍不識黃死生掩泣道旁人詢其故憐之曰此間有王四老者以媒氏爲生倘知之乎導之訪王老則知黃氏復適仙居縣吳義官緒復之仙居宿吳氏宅有媼出問之卽吳義官之嫡亦不詳黃所往呼老僕問之漫應曰死矣金鰲寺前其棺

在焉緒以與夢合求一見棺中道有牛觸緒墮溝其家駭  
而出問告以故其人曰吾向爲輿丁記嘗與一婦至縉雲  
蒼嶺下殆是乎今存亡未審寺旁棺則譌耳卽縛一肩輿  
出請緒乘之至嶺下曰當於此求之矣緒在嶺下值往來  
者隨物色之有織屨者告曰去此三舍有陳姓老婦乃寧  
波人緒如其言偃偃行見一嫗立門首探之寧波人也問  
所從來果合嫗亦問邱氏消息乃相抱哭時陳翁老無子  
并翁迎歸養之外舍翁卒迎母入室率婦子奉事甚至縣  
令疏其事於朝詔旌其門

張時微邱  
孝子傳

陳良言字志行槐之子父患目障歷醫三月不效因以舌  
舐之旬日愈母得瘋疾七年不能起便溺皆身自抱扶浣

濯必躬任夜則臥牀側既卒伏苦哀泣三年葬後廬墓三年先是父柩在堂隣家火將延及望北呼號風遽返火滅

聞志

楊芮字大章途行見遺鏹兼有質券候立良久其人徬徨

而前覈實歸之

聞志

衛清字順安五歲而孤號慟不食者五日鞠於季父及長事之如所生有偷兒入室被執乃其比隣與以金縱使去有積負者欲鬻兒以償爲焚前券更貸之好遊名勝自號

山水間人

聞志

何瞻正統間與同邑胡純遊國學純病疫鄉里姻舊避之無一人問者瞻爲視藥餌饋粥越七日病如故瞻憂之解

衣與並枕抱臥得汗而愈贍亦無恙後贍仕至刑部主事

純亦至工部主事

李志

陸儻字文亨其叔垸病革子偁尚幼呼儻謂之曰使弱子不廢學者汝也儻任家政銖金寸帛不入私室而延師課偁惟謹後成進士家有猫共乳之異李西涯爲作歌記其事好施子貧者稱貸如所欲與之券亦不却旋即亡之豪猾兒知其善亡亦持空券來請即貸之而不記其券餘姚孫燧死宸濠之難歸葬其鄉既卜地而索直昂甚其子謀之儻立與數百緡後以助賑功授宣教郎

聞志

張懋字汝誠有佃田者閔其窮匱歲貸所輸租後并其田畀之隣人盜其田粟有告者懋指他田示之曰吾粟未嘗

失也子時敏亦長厚視臧獲童稚常若有傷有貿易察人  
顏色如數與之卽見給弗較後以子邦奇貴與懋俱贈南

吏部侍郎

曹志

張竹字汝懷平生與族黨處無少長貴賤一接以禮僕從  
有過不加譴責或宴起但往來沓沓行戶外僕輩議之曰  
此主人履聲也亟啟戶終無一言嘗舟行過市有童子市  
絹誤溢其一命止舟以待薄暮其人果來舉所溢還之後  
其子時徹爲南京兵部尙書贈如其官

嘉靖志

楊欽字允恭鄞之布衣也先是西鄉廣德湖旣廢募民墾  
官田輸賦如佃戶例後許墾田者斥賣田爲民業而賦重  
如故然猶止納租不令值他役正德初差發日繁湖田之

民逃亡者相繼欽走京師叩闕具陳民困請援慈谿花嶼湖例用全折不賦米而輸銀朝議允其奏參政馬某糧儲董某復牽制不行欽三上書爭之下所司勘覆郡守林富力爲之主竟得改折鄉人立崇德祠祀之

聞志

杜常字守經初爲奉化功曹同曹掾有病疫者爲視湯藥或竟夕不還其人有妾在每往必與其僕偕明燭達旦移役蘭谿道拾遺金跡其人還之蘭溪章懋以是相器重與定交後授廣西龍江驛丞有以毒籐自殺者誣其怨家郡守實其事獄具當死憲司檄常使覆訊竟出之郡守惡其反已成案答焉常曰辨冤而死可矣答何憾耶征蠻事起檄之督兵以疾卒於邸舍

開志

周萃字水心嘗於城岡拾金一囊中有賦牒知里正所遺跡之至酒樓里正猶未知也示以囊乃泣謝兄弟三人友愛無間同墳而葬

曹志

裘望亭者失其名明季人其兄憶亭娶妻陳生四子而沒陳之兄日勸妹改適望亭持不可陳兄知其貧也則以孤嫠不能存活爲言集親隣共議望亭泣曰兄雖沒嫂姪衣食皆吾責倘撫養有闕則聽別裁親隣咸義之稍助以貲設米肆西關外與傭保共舂作以其贏奉孤寡後稍裕人勸其議婚則曰吾一有妻子必不能分顧兄子卽吾子也終身不娶

詩學錄  
撰傳

陳洪憲字紹昌年十六而孤母范氏性方嚴洪憲與妻朝

夕左右侍食食已撫摩抑搔命之去然後退有不當意夫  
婦長跪牀下俟色解乃起重然諾敦信義進止皆有常度  
未嘗爲隔宿之游卒年六十終不識西津壩道人推爲隱  
德君子子文奐字伯美弱冠喪父以母老家貧棄舉業獨  
資其弟讀書母多病夜必帖牀寢及逝哀毀孺慕後以其  
子錫嘏成進士入詞館贈如其官

志聞

李訥字宗厚性孝友伯兄無子依訥以居事之惟謹及卜  
父塋將祔兄于右堪輿家以爲孤寡同壙不利子嗣訥曰  
吾知有手足何忍使兄無血食也卒祔之仍戒子孫勿替  
厥祀子綺能世其家孫坤元尤善詩文學者稱九隴先生

志聞



李恩先以割股療父疾崇禎三年詔旌其門月給廩米終

其身

閩志

董德偁字天鑑父應圭由舉人知鄧州甫至官卽爲流寇所圍德偁從一蒼頭兼程往問道縋城得入時父以憂勞成疾驚曰吾有城守責死乃分也汝奈何身試不測之險相持而泣父卒崎嶇兵間扶櫬歸葬崇禎九年領鄉薦十年試禮闈前一日從兄德襄病疫死奔赴視含殮及抵試闈唱名已過告主者以情乃得入中副榜遂買舟載兄柩回魯王監國以薦授戶部主事辭不赴晚年憔悴行吟當事欲見之拒不納

續耆舊傳

范光越字元之父患瘧數年醫禱弗效叩董孝子祠籲詞

哀苦願以身代夢董授以奇方服之果愈世傳董孝子神

效方

聞志

國朝

董師儒字若舒爲諸生家素貧母有痼疾兄又病盲師儒竭力資生會並舍失火先負母出再扶兄以避不攜一物貧益甚生事死喪殫誠盡懋當事以孝子旌

李志

范洪震字驚百年十二失怙哀毀骨立事繼母如所生父億得危疾醫言胃氣已絕無活理不與方洪震哀祈不已醫言惟糞辛獨可治洪震嘗之果辛醫與藥旋愈由是讀古方書日候父脉理氣色遂精其術友人杜懋俊殉義其孤有疾向洪震市藥洪震躬往療治且傾貲爲授室葬其

家未葬者三喪後洪震病衆爲設醮事所禱請代者皆其平日所拯濟之人也順治十四年以孝行奏 聞建坊旌

表

結琦亭集

朱篋字又吹邑諸生九歲父病哀詞籲天稍長事母尤謹雖嚴寒夜必數起痛父柩未舉常戴一骨簪自警經營數載乃得以禮葬焉

聞志

陸崑字華星三歲其祖授以孝經跪而承之在親側未嘗有疾言遽色祖年八十餘惟崑侍食能當其意爲加一殮喪母晝夜哭無時哀動隣右館穀於外值母忌日雖甚風雨必攜母所嗜而歸未至家已嗚咽事父左右承順無少忤順治十六年五月海寇從穿山入郡東殺掠不可勝計

崑奉父匿其親殷氏寇驟至不及避先執其父欲刃之崑哀詞祈請願以身代父得釋崑竟遇害

李志

楊之奎字聚星幼喪父哀毀如成人母以紡績爲活每午夜一燈熒然讀書聲與機杼相間聞者嘆羨之後以治生起家會仲父早逝遺孤又天事叔母曲盡其志一門娣姒遂俱以全節稱

閩志

屠惟澂字毓源父本草病刲股和藥獲愈弟惟淙補諸生後疋瘠幾死泣曰吾祖父學統繫弟是賴如不起是絕吾祖父也復刲股願以身代子恒忠遇父病亦刲股以救於祖父亦然人以爲不匱之教

閩志

錢美恭其父士驄明末由舉人知嵩明州卒官道梗音耗

不通美恭侍母家居及滇南內附將往求父家貧不能具  
裝同里范汝植挈之至粵西贈以資俾入滇至蒙自縣宿  
旅舍有楊姓者聞呻吟聲入問知所以至告以葬通海縣  
南山復力疾至通海途遇關某爲士驕鄉閹所取士告以  
有舊僕居某地仲子亦流落縣中如其言訪之兄弟已不  
相識相抱痛哭同省墓南山謀歸葬而資已竭畱滇爲募  
客積數載乃得奉父榧以歸

全祖望墓表

朱金誥字宸宣母病醫禱無效老僧告以刺指血書梵典  
病果瘥父疾篤復刺臂血繪大士像父亦愈兵亂負母避  
葛氏破屋更深虎排闥入金誥以身蔽母虎目光爍然環  
視臥榻而出又遇盜哀告求免示以臂所刺痕盜亦感嘆

而去會恩例孝子被旌者授官金誥以母老力辭督學谷

應泰爲給餼終其身

曹志

陳玉綸字爾昌出爲叔父貫虞後侍養以孝稱兄國綸欲割畀本生產之半辭弗受授徒雍邱侯氏其家延師張宴出女樂侑觴席罷就寢聞戶外剝啄聲啟視卽侑觴者拒  
不納次日主人拜曰君真吾子師後以子紫芝貴贈奉天

府府丞

曹志

王鴻業字千秋瑄之元孫父卒未葬殯所適火發將延及急從烟焰中奮臂撲滅鬚髮盡焦長兄沒其子鬻田供喪具售者嫌其瘠卽以已田易之

曹志

李景濂字亦周四歲喪母父繼娶何氏未幾死景濂方六

歲哭踊如成人稍長家貧有謀奪何志者竊袖鐵錐伺其人於道擊之傷馳歸泣以告何何亦抱之哭遂誓於其父木主前相依爲活何日織紵景濂負販於市夜則就織火讀書得補諸生何性嚴小不怡卽長跪受杖何有痼疾景濂視眠食滌厠踰凡七年而愈至八十二卒景濂亦年六十餘獨居丙舍每風雨望墓哀號不異孺子泣云

全祖望墓志

董道權字巽子諸生父守諭有高節喪亂之後家盡落而四方士至者咸造其門笑談讌集必盡歡酒食皆道權心營手治不令父知也母陳生長華族不耐寒苦悉力供饋無異常時終身未嘗一踏省門工詩長於言情無枯槁憔悴之態

續書舊傳

呂蜚鴻字賓來母疾割股以進夜深則禮北斗願以身代情詞哀惻或問君本諸生亦篤信道家說乎答以但求能愈親疾有一可叩不敢不盡吾誠否則周公聖人胡亦云以且代某之身也後母疾果瘥公府累旌其門

曹志

陶顯曾事親孝父病搏頰禱神願以身代夜夢神與之藥得痊母疾殆嘗其糞苦醫言可治後亦愈康熙四十五年

旌表建坊

禮房冊

李秉誠年八歲喪母擗踊如成人稍長繼母卒廬墓者三載嘗以父命貿易他縣忽心悸歸父已寢疾臥牀六年侍奉不懈康熙四十五年旌表建坊

禮房冊

厲顯祖字肇禎國學生嘗館鹽場俞氏一日大風雨平地



水數尺薄暮或以其父病告亟歸行泥淖中屢躓屢起五鼓竟抵家父沒哀毀盡禮嘗赴北闕至越城夢人貽以二棗忽心動曰棗得非棘人之謂乎二棗謂我兄弟二人也立棄舟徒步馳數百里比歸而母沒已三日猶得視含殮自後凡見服物器用爲親所遺者必流涕與弟最友愛一日論鄰里公事不合徵反辱中夜自責曰吾同氣僅二人乃以小忿失歡尙可爲人子乎旦趨叩弟門謝過相持大慟家人皆哽涕平生好周人急嘗失盜家人請告捕曰彼迫於饑寒耳一被獲卽終身不得齒于鄉姑置之次日侵晨起見墻陰物累累皆所失者蓋盜感其言而擲還之也

巡道孫詔書醇德二字旌其門

王喬林作行狀

羅岳字友山父綱文以寫真擅名岳亦工其技尤善墨竹康熙三十八年綱文坐累將就逮岳白於官請代遣戍鐵嶺衛奉天尹知其以代父至優禮之由是得周覽山川嘗騎白驃衝雪至蓋州遇獵者招飲卽相與踞地炙鮮拔佩刀割啖衆驚異詢知始末共傳客焉遇赦歸年已五十餘而綱文尙在盡卹養復數年年七十六卒

汪國羅孝子傳

魯道立七歲失父號泣隕而復蘇者三母劉氏教以讀書晝夜不懈遂爲名諸生母病禱於城隍神願減己算以益母尋得痊隣居陳氏子不孝道立責以大義陳亦改悔嘗授徒於外載父母木主於書笥每日饗殮先祭後食所得修脯分給鄰里之乏者乾隆五年詔旌其門

禮房冊

朱世燧父病禱神請以身代夢神告之曰汝誠孝感天當  
勿藥愈矣家貧以筆墨所入供甘旨父沒以父手書一幅  
懸之中堂展視哀不自勝乾隆九年以孝行 旌表建坊

禮房

冊

俞虬國學生親病衣不解帶者經月爲母吮癰昆弟同居  
終身不言析產乾隆三十年以孝行 旌表建坊

禮房  
冊

包幹節字惠人八歲喪父見母哭輒借之長號及長奉事  
惟謹母嗜魚日侵晨起候于江汜見漁舟擇其大者攜歸  
佐餐後漁人習之得巨鱗曰此包母饌也母患頭暈臥牀  
久肌潰生蛆百方治療不痊乃刺指血寫疏籲天求以身  
代母恍惚中若有授以藥者頓愈長兄早沒幹節有市屋

一區歲得租若干悉推以奉嫂兄子遠出迎嫂養於家俟其返而歸之母沒營葬畢卽築廬墓旁有疾其子將迎歸叱之曰爾獨不可侍疾於此乎三年畢始返值忌日涕泣如初喪乾隆三十七年有司以孝行上聞 詔旌其門

采郡

邑中

阮慶榮字一懷其先自慈谿遷鄞補縣學生性孝友無疾言遽色諸弟亦依依提攜各相得也里中言雍睦者必首及其家少負才藻從史榮受業晉寧李因培視學江南招人幕下工書法尤精小楷同里董任家藏法帖墨迹最多慶榮朝夕過從遂得其秘好道家言訪名山求金丹大藥

年四十一卒

據羅有高范  
永祺二傳

藝術

自龍門作史記而扁鵲倉公日者龜策具列於傳  
班書之京房翼奉陳志之華佗朱建平吳範趙達  
亦其類也而裴松之於趙達傳附注皇象曹不興  
嚴武等則書畫奕棋之入於藝術古人已開其例  
矣一技之微亦必具宿悟神解殫畢生之精力乃  
得成名勿以致遠恐泥而忽諸

唐

陳藏器開元中爲京兆府三原縣尉著本草拾遺十卷謂  
人肉治羸疾自是民間以父母疾多割股肉而進

唐書藝文志及

孝友  
傳

宋

日華子開寶中人撰諸家本草不著姓氏但云日華子大

明序

本草綱目序例

全祖望曰嘉祐本草載陳藏器曰華子二人甚明其云陳藏器卽日華子者出於明之豐吏部以世有陳日華談諧也不知別是一人近或以日華子之姓氏爲大明則更謬也

臧中立字定民毘陵人元豐間客鄞南湖時抱病求療者日數十人診治如神崇寧中徽宗后病甚詔求良醫中立應詔以布衣麻履見帝命之入診出問何症中立對曰脾脈極虛殆嘔泄之疾作楚和藥以進日服此得睡爲效至夜半果思粥食不一月獲安賜歸詔出官帑市地築室南湖以居焉因名迎鳳坊卽今迎鳳橋也

尚友錄

元

倪克修讀書好禮嘗建閣招納賢士大夫絃歌其中暇則

學王元章寫梅深得其趣水墨取法郭熙而筆法蒼古

李

方證號岷山工花木鳥獸海錯種種入神

續圖繪寶鑑

王立本郭宗茂郭小山秦光陳曦五人俱以畫馳名

聞志

明

呂復字元膺少孤貧從師受經後以母病求醫遇名醫衛人鄭禮之遂謹事之因得其古先禁方及色脈藥論諸書試輒有驗乃盡購古今醫書曉夜研究自是出而行世取效若神其於內經素問靈樞本草難經傷寒論脈經脈訣病原論太始天元玉冊元誥六微旨五常政元珠密語中

藏經聖濟經等書皆有辨論前代名醫如扁鵲倉公華佗  
張仲景至張子和李東垣諸家皆有評騭所著書甚衆浦  
江戴良採其治效最著者數十事爲醫案歷舉仙居臨海  
教諭台州教授皆不就

明史方  
技傳

陳遠字中復一字中孚濮州人工書法尤善模寫人物嘗  
過四明愛其俗淳厚家焉太祖召至闕廷命寫御容賜金  
帛以文淵閣待詔歸里成祖遣中貴驛召賜賚益厚憫其  
年老復賜歸年八十七而卒遠爲人清峻剛直而意度閑  
雅士大夫多敬慕焉

成化  
志

陳觀字孟顛永樂間召寫五經四書性理大全書成乞歸  
書翰迢媚可嘉弟叔毅模寫人物唐馬皆有生意

成化  
志



案朱氏靜志居詩話謂明洪永間有四陳觀一不知何許人中洪武辛未進士一中洪武丁丑進士福建永福人一中洪武庚午舉人字子濶富陽人一字思賢南海人不知四明尙有孟顥也

汪正字大雅四明人工八分書

書史會要

目講僧

或作慕講非

不知何許人隱其姓字或云元進士晦跡

於僧或云嘗爲陳友諒參謀兵敗逃爲僧明初來鄞善堪輿術爲人卜葬無不奇驗嘗曰吾當以目講天下故皆稱爲目講云邑中大家先世墳墓多出其手故久而益神之

李志

陸昂字季高始居會稽遷於鄞幼習舉業好博覽父病遂

棄業攻岐黃書以醫自給聲名大著永樂初辟至京師預

修蘭臺金匱元機素要書

嘉靖志

王尹實永樂初以篆書擅名海內

東里集

謝升工楷書永樂七年進士官監察御史

聞志

楊尹銘永樂間以楷書進歷官中書舍人小篆師周伯琦

書畫譜

案烏斯道有贈楊允銘小篆歌卽尹銘也

周宗琬樓恂水秀容楊魯永樂間皆以楷書選宗琬官至

刑科給事中魯官中書舍人

聞志

胡宏字任之少讀易遇一道人語曰我有秘術子可受之

但不營仕乃可免禍耳遂以卜筮授之發無不中

異林嘗有

士人應試書串字宏曰君不惟中舉兼中進士串字二中  
也一士聞其語亦書串字以問宏曰君且勿言科名當憂  
疾病其後二人一連捷一得重疾幾不起或問字向何以  
吉凶相反宏曰問者出於偶爾從而效之則有心矣串下  
加心故應得患嘗著筮書曰黃金尺

兩浙名賢錄

王坡病瞽善六壬兼釋易繇至武林有驛傍人占家宅坡  
云今年四月十三日當雷震堂棟不傷人後果然鄞斷塘  
祠塑神像成或託以人占之坡曰此人如木偶難逃水火  
暮年果爲惡少投於江復碎而燬之僉事黃譽性嚴重人  
莫敢近招坡筮之坡曰似得鬼責公前歸時失展先大夫  
墓有陰譴黃下淚曰然坡曰明年當轉官在本省藩職後

果然

嘉靖志

倪光字應奎少受易爲舉子業已感土木事兼讀孫吳講擊劍之術時時沈玩先天忽朗然內覺若有神授偶過日者胡氏肆見門懸湖田二字因占之曰田者墓田象也湖立水旁而從墓田其必以酒濁乎後胡氏果醉墮水死遨遊兩京名動諸公卿皆爭致說易一日在楊守陳所忽中使至光見一雀自庭樹集於地已復還集樹卽謂其使曰汝來得非失馬乎六日當復使大驚守陳問其故光曰雀踴躍物也去樹而集於地舍所依也已還集樹復歸其所也其集樹也自北而南水數六也故曰馬失而六日復因問馬色光曰以北水尅南火當黃而近於黑悉驗諸公咸

以小康節呼之閣老萬安欲薦官之光遽辭歸都憲王應鵬少至光家光奇之問得莊字光曰莊子開卷說鯤化其應鵬必九萬里乎以楊氏甥妻之張都憲楷聞有南都之命其子露曉叩之光時收書遽迎門謂曰君翁將起用被恩露必南都然不久而收有產子者至則傘裂其人失色光曰傘裂而小人見汝細君已育子可喜矣其前知類多如此平生不殖產所獲卽散之人日借洪兵部常金太僕湜嚴兵部端宗憲部佑及散人李端王政爲社會賦詩爲樂年八十擬淵明自祭杜牧志墓事懸像設奠延慶寺爲詩自挽屬羣公和金太僕別書竹題詩爲壽曰先生舉殯吾爲寫真其達生委命如此人皆稱爲味易先生

嘉靖志

周頌字宗盛仕爲廣東幕僚年五十餘解綬居杭善寫春

草蘭竹盎然有生意

杭州府志

詹僖字仲和爲縣諸生已而棄去學書師王右軍樂毅論東方朔贊及趙文敏度人經金丹四百字七觀焦君碣諸帖皆逼真年七十餘燈下作蠅頭小楷適勁可法自號鐵冠道人父復禮故善書僖實過之兩京俱有碑刻人皆珍焉僖名動公卿而亢潔自好終不屑丐一官人以是益高之

嘉靖志

僖行草法趙文敏一點一畫必有祖述自云刻意

書學五十餘年方悟旨趣嘗以子昂款式落之雖識者不

能辨

書史會要

張懌善詩文小楷行草師鍾王

嘉靖志

徐詵字和仲先錢塘人父宦遊四明遂家焉以春秋教授鄉里成祖在潛邸以能琴召錫賚殊厚既歸舉明經爲邑訓導卒於官詵自曾祖逮其父皆以琴專門而詵尤妙時游江湖大爲知音者推讓有薛生者善琴操烏夜啼號薛烏夜每請詵鼓之弗許薛求好事者邀詵爲鼓此曲薛生隔壁潛聽之已趨出拜伏几下曰願爲弟子以故稱徐門琴爲浙操凡經訂正者號爲神品曰梅雪窩刪潤譜同里

若王禮金應隆吳以介皆受業焉

嘉靖志

樓得遠博於文藝奕稱國手永樂初驛召至京偕江陰相子先入覲子先自謂天下無敵手視得遠茂如也帝命二人對奕顧中官密取紙畫冠帶置局下得遠奕屢勝啟視

之遂命吏部給冠帶

兩浙名賢錄

趙九成初爲郡學諸生素滑稽寡檢束爲督學所黜以棋游京師一時棋士對局皆屈孝宗御燕殿召九成試之果壓流輩所行算多出古棋譜外帝曰真國手也命官鴻臚序班供御其後乃有范洪

嘉靖志

范洪字元博以奕棋自娛游京師時李東陽楊一清喬宇當朝每延致對局備極歡洽而洪未嘗脂韋故敬禮益甚其奕嘗隨人高下與之對不求大勝然終不一挫劬遂名國手時人以金忠卜袁珙相呂紀畫范洪奕爲四絕云

嘉靖志

呂紀字廷振精於藻繪初學邊景昭花鳥袁忠徹見之謂



出景昭上館於家使臨唐宋以來名畫遂入妙品獨步當代嘗戲畫雌雞壁間而生雄繞其側弗去孝廟時召至京師官錦衣衛指揮同知爲人謹禮法敦信義縉紳多重之其在畫院凡應詔承制多立意進規孝皇稱之曰工執藝事以諫呂紀有焉

兩浙名賢錄

從子高字崇岳棠字德芳翎毛花石皆得家傳從學於紀者蕭增字益之得其用筆之妙

官錦衣千戶劉俊字克美陸鎰字守重號古愚筆墨俱能

入室

聞志

胡鎮字守寧號秋泉呂紀徒也工翎毛花卉山水穎脫流輩紀以後遂稱獨步兼潛心書學多綜覽古來名帖

續圖繪寶

繪寶

董沿字宗明寫魚鰕水物活動可愛

續圖繪寶鑑

吳東園精花卉草蟲筆墨流動堪與孫癡並馳

續圖繪寶鑑

李文亨字得愚工花鳥規矩呂紀備極工巧

明州畫史

俞廷玉工畫魚水藻子仁字仕傑亦善父藝孝宗朝授錦

衣鎮撫

聞志

陳孔義字仲德本深孫勤於問學補博士弟子員善水墨畫生八子各有所傳長子猷字莫之嘉靖三年以鄉貢訓導涇縣陞海豐教諭工詞賦善諧謔尤好畫驢意在筆先落紙躍躍有生氣偶有僧丐畫於猷立作一幅以贈不施韁羈僧捧愛如拱璧出視友人友笑謂曰爾慢陳君耶何以禿驢相謔也僧旋向求改隨爲增之繪益工次子勤字

補之究心天文地理書亦善畫常寫牡丹松鶴以歲薦官費縣訓導始涖任值新生入泮以贄見勤曰余初至諸生未沾教化豈可先受脩脯竟却之性孝友弟正早亡婦徐氏少寡撫孤以守賴勤濟輔之從子宗韜天亡韜之二子亦殤妻畢氏子身孝事姑嫜勤有詩紀其節四子恭字安之得父傳善畫葡萄松鼠世頗珍之

李志

高武號梅孤好讀書天文律呂兵法騎射無不閑習嘉靖時中武舉北上歷覽塞垣以策干當路不用遂棄歸所言乾象皆驗晚乃專精於醫治人立起嘗慨近時針灸多誤手鑄銅人三男婦童子各一以試其穴推之人身所驗不

爽毫髮

李志

趙獻可字養葵好學淹貫尤精於醫其醫以養火爲主嘗論命門乃人身之君養生者不知樽節致戕此火以至於病治病者反用寒涼以滅之安問其生著醫貫一書論議有前人所未發者後游秦晉著述甚多子貞觀字如葵亦精於醫治病未嘗計利旣治之或夜半自往叩門候其脉症以用藥其篤厚如此

李志

鍾大延字垣國本江右仕族後居鄞精於醫治病不執恒方嘗言人有強弱病有淺深豈得因病執方有二人同時病痢一用補劑一用攻劑或問之曰此稟弱須補其正氣而後攻之彼體強故祇用攻耳徐時進痢小便秘腫脹面赤發喘衆醫皆從熱症治益甚大延視之曰是無火也煮

附子湯一服而愈一貴家孕婦病亦如之衆醫莫效大延  
視之曰是可弗藥也乃胎壓膀胱耳令其周身轉運而瘳  
一寺僧嗜鹽每食勑許衆醫雖知其爲蟲然服藥輒痛悶  
欲絕大延曰是蟲不受藥也當有以餌之以鹽筭乾用藥  
煮仍加以鹽令服越數日果嘔蟲數升而愈又一人酷暑  
歷山中時飲溪水至秋患泄痢諸藥不效思食西瓜而醫  
家禁不予大延曰但食無妨稍進覺安益令食之遂爽然  
用藥數劑而愈其奇效如此弟懷國亦得兄之傳聞志

陶侑字一山畫龍澹遠得隱見之法畫虎尤精聞志

周龍字東洋工寫人物聞志

樓裕初名光裕號順寰工傳神兼精花卉聞志

董應禎號畸吾畫蘭淡雅名重四方

聞志

李奎字石梁少尙俠避仇亡匿湖海十餘年始歸乃折節讀書精於醫洞究內外經得其妙有誤吞指爪喉梗幾殆奎令翦人指爪燬服之立愈疑其有故方奎曰此內經所謂衰之以其屬者也好古金石及名人墨蹟植花草滿所居年八十三卒先是有李蘭泉者以醫名世奎術蓋得之

於蘭泉云

李志

徐蘭字芳遠其先餘姚人後徙鄞爲郡諸生累舉不第遂潛心書法正書師鍾繇宣示表行書師王獻之授衣節過等帖皆淳古遒勁尤精六書考究點畫正其訛謬作古文奇字得邊魯生筆法八分初法淳于長碑晚年參以己意

遠近求者無虛日間有挾勢位使輿隸致之輒白眼叱去

曰吾豈祇役者耶其高自矜貴又如此

李志

陳箴號石峯工人物落筆秀朗奕奕生動

明州畫史

王楷號懷東工翎毛花卉伍連塘亦工花卉

明州畫史

何瑋字叔田精書學尤工篆通易理豐坊嘗師事之自署

下下田夫

聞志

包檳字子和精於書嘗與豐坊論書法坊著鹿亭子傳手

書以贈焉鹿亭檳自號也

聞志

方仕字伯行善書畫豐坊亦心讓之

聞志

張惟正號野雲工漢隸羲獻行草爲詩瀟灑出羣

芝園集

沈文楨字時幹家芙蓉江上自號漁江工書能作方丈大

字

弁州  
續稿

林芝字仙容初爲邑掾工書諸體皆能而尤善行楷郡中

碑碣題額之類多其手筆一時縉紳大夫莫不折節下之

李時會稽朱文相居鄞善鑄石芝字非相鑄不書其相重

如此

問  
志

童蒙古字養正工草書其族子嘉猷字獻忠亦能楷

問  
志

史均民善花卉以水仙馳譽

嘉靖  
志

王養蒙

問志作  
養明

畫葡萄障乘醉著新草履漬墨亂步絹上

就以爲葉布藤綴實天趣自然

畫史  
會要

蔣愚號元默道人工山水師丁玉川能造其妙子芳克紹

父傳其後乾及佐時亦以名世

問  
志

下系示

卷一 藝術

七



郁謙字自牧寫雲山竹石皆有可觀

問志

張恒字仲正號野仙初受業於王東原後法吳小仙筆意

墨氣流動精雅絕倫

問志

范諶字行甫

問志諶作瑱誤

工畫松兼翎毛草蟲春草蘭竹清逸

可愛自號墨逸居士嘗游徐州見道上一石曰此中有瑪

瑙剖之果然晚年爲同郡李同知畫春草冬日展觀於庭

蜂蝶並集歸語其妻曰吾將死矣謂精神盡於用筆也未

幾卒

范氏

周軌字延用工魚鰕水藻孝宗朝賜工部文思院副吳琪

字世用初師軌晚得過之其翎毛亦神動

問志

倪珣字佩甫墨竹法夏仲昭兼工花卉書法亦合古

問志

毛鷓號磊崖善翎毛花卉草蟲曲盡物理精細絕倫續圖繪寶鑑

吳景行畫青綠山水師董源而雲氣修揚飄然空際與胡

仲厚齊名

嘉靖志

盧養韶工人物翎毛尤精蘆雁

明州畫史

傅子英善模寫人物

問志

趙備號湘南善寫竹縱橫雄逸迥出一時嘗客維揚同里馬斯臧以指揮領漕北上具白縑四欲備寫萬竿烟雨圖以奉一要人備卽轟飲大醉研墨盈缶旋潑旋收高下濃淡斜正大細淋漓鬱區別分明要人得之大喜遂擢斯臧爲督運其爲世所珍愛如此子龍孫山臣良臣甥呂一

正字端叔並傳其法稱於時

李志

高陽字秋甫善花鳥畫石極精如太湖錦川英石蠟石皆

妙形似

畫史會要

少工寫生有儀部邀陽貌其父陽惡其慢率

爾應之儀部志訟之有司因盡室避居金陵改畫山水花

石從子友字三益所作與陽無異雖陽亦不能辨由是二

高之名盛傳白下

李志

後有周奎字太室花卉根本高陽自

成一家兼工寫生妙得烘染法

明州畫史

吳湘字白洋初受父世用之傳精人物草蟲花卉中師奉  
化盧研溪後復取法於張平山爲人有風格兼善詞賦絃  
歌所得贈遺輒以待賓客及賑親交之貧者他若李應斗  
楊德偉之翎毛花卉亦畫家之出色者也

李志

楊治卿字春精翎毛花木縱橫變化筆狂墨舞擬之書

家質顛張狂素之流

明州畫史

楊澗字汝文號娛山工山水長於界畫精密之中天趣自

如澗徒戴質字師進蔡元字貞伯皆工山水陸連康字仲

碩工山水尤精松石陳霖字公霖工人物山水

明州畫史參李志

董策字青寰弟能字青田並工山水

聞志

李麟字次公精自描人物自署龍眠後身中年好釋氏禮

僧達觀爲弟子遂專畫佛像年八十餘卒弟驥字次德其

藝與兄均亦師事達觀嘗渡錢塘負擔書履其行李去乃

想其貌而圖之揭於通衢其同侶見而笑曰此某人也遂

借詣負擔家行李悉在從子塈亦工寫生得麟之傳

李志

任重字公毅弟翊字公遠師李麟寫人物山水

志

全天麟字泰徵天敘從弟以漢隸名是時全氏多工書者  
天駿字思若大科字務觀皆以行書惟大震各體皆工

結

集

楊當時字漢卿張子魚字公魯俱善詩能書篆工鐫印爲

時所稱

李

胡岳工花卉雄偉浩瀚揮灑滿紙

明州

李振聲字友竹寫花鳥

明州

張堯叟榜寮之後能詩工楷書

志

章載道字長輿以明經爲訓導能詩行草書淳熟秀雅

志

聞世揚字季鷹行楷法智永

志

楊大名字翰海鄉貢官縣令草書亦守矩矱

聞志

陸燾字公履諸生楷書秀媚有骨行書亦極神動子筵篆

皆能書

聞志

竺賢字賢生武學生能行草署書亦嚴緊

聞志

倪大正字伯陽弟大陞字伯益皆工傳神又倪起相張文

峯孫玉泉皆以傳神名

聞志

陳節善寫山水筆致縝雅

聞志

胡華達號雲仙山水傳神俱超俗

聞志

汪天培居西山善畫梅花

聞志

顧聘字起莘工山水花卉客廣陵

聞志

金武臣善人物山水

明州畫史

呂健字六陽工翎毛

明州畫史

陸驥字千里縱筆寫山水燧字宴如亦工山水

聞志

毛復光工寫葡萄

聞志

徐晉字晉侯李廣猷字慎思俱工山水

聞志

龔諫號海仙善人物精神酣暢呼之欲出

明州畫史

朱欽字本誠號秋月工仕女仙釋寫照皆清勁設色有法  
子淵深得父傳從學王瓏字克明號松崖山水法小仙亦

稱妙品

聞志

李標字新之工山水花卉

明州畫史

薛瑜字文玉寫照濡染得古人之法其畫梅瀟灑有韻

聞志

孫元華字體誠號忘湖佑聖觀羽士工畫魚水藻

聞志

陳瓘號石湖工山水人物禽鳥王歡工山水張守中工翎

毛

明州畫史

余樵字子奇號明湖居士工山水邱壑超遠爽人心目

明州

畫史

何默瘖人工寫人物

聞志

黃雲衢字小癡工人物善臨摹古人

聞志

楊錦工寫士女

聞志

周一懷托於緇流名海懷字太涵工花卉尤精墨牡丹及石寫山水亦多別致鏡炤字本澄亦僧人住東林菴工山

水

聞志

何一帖失其名居桃源鄉世傳傷寒科劑止一服疾可決



已故人稱爲何一帖宏治間有何鏞邑令曾直以小丹溪稱之萬歷初何松何桓郡丞陳文邑令劉惠喬皆以明醫相重最後何望雲能世其業

志問

盧銑號水西醫學精察其著書及痘疹論數種行世皆稱

名言

志問

沈應鳳字瑞峯磊落不羣慨然有濟人利物之志精於醫時李康先在朝薦入太醫院授吏目從事久內府秘方皆其手錄都下士大夫皆稱爲神醫孫可相字文垣能紹其

業

志問

王俊然字英甫號少密先世歷官醫院所傳多秘緘因探索之遂精醫理嘗以拯人爲念窮鄉窅谷不憚勞瘁又每

歲多製藥施人後授太醫院吏目

開志

周理卿字玉芝刻意岐黃巡海道向鼎有奇疾一七輒瘥遂以此馳名每當春夏時凡閩甌捕漁者皆踵其門隨症用藥無不見驗遇貧者不取一文崇禎末立局散藥全活者甚多

李志

毛來賓字岐陽生而侷儻負奇不屑屑章句多巧思善製沙漏大者盈尺小者僅數寸以定晷刻無毫髮爽者邂逅一僧異其術以重賄求授不許因以追魂法易之其法於密室中潔壇坵薦牲牲香帛置繪具几上閱四十九晝夜能令神將驅攝亡魂追摹形貌無不肖來賓得其術未嘗輕試偶之書中爲閔氏繪其先父母像見者驚猶生不

數月致數千金而歸同里謝于宣在京被鬪賊掠死其父  
三賓延來賓追攝乃置壇設牲如其法及期而素箋十幅  
細書皆滿凡生平履歷家事瑣屑童僕勤惰以至父母妻  
子間語有人所不能知者縷縷曲盡其神異如此懼驅役  
鬼神遺子孫禍取書盡焚之其術遂不傳聞志

國朝

何經字醉六祖詢明嘉靖間與修國史以書法稱旨授靖  
江丞經能詩其書於篆隸行楷皆兼能初爲處州府教授  
順治十三年以考書獲選辦事內院隨奉命寫毛詩

世祖嘗親自臨閱且慰勉之未幾感微疾特諭太醫診脉  
進方賜以湯藥病愈補蘇州府經歷賜白金一百兩命齋

毛詩之任書竣進呈又賜白金一百兩後告歸卒於家

李志

周嗣憲字西仲諸生行楷師趙文敏畫法董北苑董守正

字澹子工寫花石年九十執筆不衰自號百拙老人

周志

馮鑒字元賞父禮工山水能傳神鑒承其業有跨竈之目

與周鼎同居鼎字伯齡亦工傳神

周志

孫志選字景陽工山水

周志

李能白字紅友能摹寫山水兼士女

周志

黃堅字幼直李麟弟子善寫人物

周志

陸介祉字純嘏喜畫老松古柏子峻亦能畫

續者

張逸字遺民善畫得婦翁高陽之傳兼精篆學鐫印與徐

啟睿齊名

續者  
舊傳

李蒞初名允升字山顏工山水蟲鳥下筆有神亦能詩續

舊傳

俞衷字雪浪畫與陸介祉齊名續考舊傳

張鐸字純叔作畫有士氣閒作指頭生活亦古雅不俗訪

冊

董任字又衡性踈懶有潔癖好藏法書名畫工於臨池頗出入松雪香光而得其神韻畫亦瀟灑不俗家富以好施與中落後爲貴州亦資孔驛丞冬月猶著葛衣嘗有句云黃金散盡無知己博得人間浪子名聞者憐之范永祺撰小傳

張濟字遂寧善拈字兼通邵氏先天數有兩秀才問功名一書董字曰君今科必中一書薩字曰君功名無分問其

故曰董者頭上簪花之象菩薩南面一生不向北也一人以無字問之曰君妻當病佳人伏臥四脚牀非病而何又有用濕筆書土字者曰君患脾洩耶土遇水而滋也當俟六月土旺則愈或以車字問何時得財曰月建申則東去十分酉去十分矣嘗遊京師王公貴人爭延致之攝衣輒據上坐不辭同里邵吏部洪問今歲可得典試及學政否隨口占午字濟曰君所願皆遂言午爲許神已許之矣已而果然縣令問母壽可若干歲書一榆字曰當八十八歲考終三月間竟驗其巧中多此類

采詩  
冊

### 寓賢

甬上風俗淳茂號稱樂土四方名流往往寄跡於

此或以道德或以文章又或避世逃名潔身肥遯  
徵文徵獻蓋代不乏人向非邑多君子何以致寓  
公之盛若此也茲采獲其可知者自漢而下凡若  
千人列於篇

漢

梅福字子真九江壽春人成帝時爲南昌尉元始中王莽  
專政福一朝棄妻子去或以爲得仙其後人有見福於會  
稽者變姓名爲吳市門卒矣舊傳鄞之大梅山中卽福隱  
處今遺跡尙多往往以福得名也

漢書及鄞峯真  
隱漫錄成化志

南齊

孔祐會稽山陰人至行通神隱於四明山嘗見山谷中有

錢數百斛視同瓦石樵者競取之則成沙礫矣有鹿中箭  
來投祐祐爲牧豢創愈而去太守王僧虔欲引爲主簿不

屈

南史隱逸傳及  
鄭峯真隱漫錄

梁

陶宏景字通明丹陽秣陵人十歲得葛洪神仙傳晝夜研  
尋有養生之志曾夢佛授以菩提記云名爲勝力菩薩乃

詣鄆縣阿育王塔自誓受五大戒

南史隱  
逸傳

唐

賀知章字季真會稽永興人累官至秘書監知章性放曠  
晚尤縱誕自號四明狂客醉後屬辭動成卷軸又善草隸  
人共傳寶天寶初請爲道士還鄉詔賜鏡湖剡川一曲御



製詩贈行皇太子以下咸就執別年八十六卒肅宗時贈

禮部尙書

唐書本傳

案以知章爲鄞人自莫將始而歷志因之正史所  
無未敢深信然四明多知章故蹟蓋嘗流寓於鄞  
也

李汾會稽上虞人嘗入四明山讀書

太平御覽

林無隱閩人流寓慈谿明州刺史黃晟頗好禮士無隱依  
之有詩名子鼎事吳越位至丞相

吳越備史

宋

孫沔字元規會稽人仁宗朝累官至觀文殿學士以知濠  
州致仕英宗卽位用歐陽修薦起知河中徙慶州復徙延

州道卒諡威敏沔遠祖邵唐乾寧中進士官河南府文學  
本四明人沔嘗以母喪求知明州會京東盜起不果及致  
仕遂居於鄞王安石令鄞答沔書曰比方得邑海上聞左  
右之別業實在做境沔與蔡襄唱酬亦曰新治甬上居閑

逸安暮齒云

延祐志

蘇舜欽字子美梓州銅山人直集賢院耆之子也嘗再至  
甬上滄浪集中有重過句章郡詩云曾隨使旆此東歸日  
日登臨到落暉疇昔侍行猶總角如今重過合霑衣窺魚  
翠壁忘形坐趁伴蜻蜓照影飛風物依然皆自得歲華飄  
忽賞心違

宋詩鈔傳

葛源字宗聖山處州麗水徙居於鄞仁宗時官至度支郎

中湖北提點刑獄王安石稱其所至樂職嗜事子良嗣字  
與祖許州長社主簿葬父潤州之丹徒又爲丹徒人矣臨川

集兩世墓志

舒亶字信道慈谿人神宗朝爲御史中丞徽宗時累官龍  
圖閣待制亶初與豐稷周鏐同學於樓郁及入朝稷嘗薦  
之亶有園在西湖歸里後與稷鏐倡酬陳瓘晁說之咸與  
焉所謂懶堂者也延祐志及句餘上音註

鄒浩字志完常州晉陵人其集中有憶昨隨侍遊鄞川又

昔侍先君官四明之句

鄒忠公集

陳瓘字瑩中南劍州沙縣人元祐時攝通判明州明州職  
用之入厚瓘盡棄不取語在名宦傳累遷至右司員外郎

兼權給事中忤曾布補外崇寧二年除名竄廉州四年移  
郴州五年放還來明州寓居南湖之南藍貧甚裘葛不具  
簞瓢屢空晏如也瓘在廉州時嘗著尊堯集意尙未愜復  
於四明著之謂紹聖史官專據王安石目錄改修神宗史  
變亂是非不可傳信深明誣妄以正君臣之義周鏐者瓘  
妻兄也時方家居瓘與悲憤時事商權成書始以爲無憾  
云大觀中瓘子正彙在杭告蔡京有動搖東宮迹杭守蔡  
薤執送京師先飛書報京事下開封制獄知開封李孝稱  
希京旨并下明州捕瓘士民哭送之瓘不爲動獄具正彙  
坐所告失實流海上瓘亦安置通州四年三月也十一月  
詔許自便政和元年正月從宰相張商英請詔下明州取

尊堯集送編修政典局時瓘已去明州居通州五月再下

通州取其書既上而商英罷瓘又徙台州矣

宋史及長編紀事本末鄭

峯真隱漫錄

晁說之字以道濟州鉅野人元符中以上書入黨籍大觀四年謫監明州船場寓舍直桃花渡而官寺有亭曰超然簿書之暇讀書自怡時時見於文章經學奧衍不肯苟同箋疏於易自商瞿下至邵雍孫復於詩兼齊魯韓三家不專主毛鄭於春秋萃賈董啖趙之說其所引據多先秦古書確乎自信成一家言又取司馬光太元歷及邵雍太元易準圖合譜之爲易元星紀歷謂楊氏以首準卦皆有星候爲之機括非出私意因歷辯諸家談元之失又自跋云

今年始見剛說於明州令人意氣自倍方在船場時部使者來治船事詬責甚峻說之從容置對言船待木成木須錢致今無錢致木則無船固宜使者爲語塞去後七十餘

年監官王鈇爲立祠

陸游祠記及全祖望祠堂碑銘

方軫字叔載閩之莆田人大觀初爲太廟齋郎上書請誅蔡京流嶺南復流永州靖康元年敘復遷鄞令貧不能歸

畱家於鄞

聞志曹志

焦公路山東布衣也丞相趙鼎欲薦之不可紹興中至四明寓大涵山麓家居修容妻子不見少懈出與物接規矩古朴史浩往見之稱其望之儼然卽之溫然聆其言接其意有大過人者既歿向時從學者尙遵禮法如公路在時

其從仕而歸者人見之不問皆知爲焦氏弟子也

鄧峯真隱漫錄

晏敦復字景初撫州臨川人程頤之弟子也仕至吏部侍郎

權尙書以忤秦檜出知衢州奉祠敦復旣退閑來寓鄞

尙有老母貧甚汪思溫時時周恤之

宋史及全祖望晏公廟記

李璜字德劭揚州江都人少負雋才頗誕放恥從進士學

里人或譙之曰我非不欲試但恐奪爾曹魁爾一試果魁

維揚後寓四明郡縣庠校記文多出其手太守仇愈周綱

潘良貴皆敬禮之或以書來云孟信安欲招爲壻資送特

豐且可得官擲於地曰老大乃復爲此耶終不娶無子晚

從宏智禪師於言下有省以筆耕之餘買田一頃施於阿

育王山病革時王伯庠往候之問平日了達今何所見曰

都無所見但覺神氣消散爾以一囊遺稿屬之

樓鑰彙菴居士文集

序

呂祖儉字子約婺州金華人祖謙弟也淳熙九年監明州  
苗米倉郡中楊簡袁燮沈煥舒璘各開講院稱四先生簡  
在碧沚燮在城南之樓氏精舍煥在竹洲惟璘時以宦遊  
遠出祖儉之來於諸講院無日不會而上學者遂以呂代  
舒亦稱四先生滕璘爲鄞尉朱熹語之曰彼中有楊袁沈  
呂可與語也子喬年沈煥塔能守家學孫寶之定居於鄞

宋史及九

靈山房集

全祖望答臨川先生帖子來論以前愚所考大愚呂氏  
官明州歲月誤會宋史之交因謂本傳止稱監倉將上  
會祖謙卒部法半年不上者爲違年祖儉必欲終期喪  
特詔改一年爲限終更赴銓改調夔州是大愚始終未



赴明也卽朱徽公與滕德粹書特以其有監倉之命故  
并及之愚重加考索竊以爲不然深寧王氏作四明七  
觀載大愚爲司倉去倉中淫祠是顯然有宦績可稽及  
考大愚東王季和詩云晁景迂大觀庚寅冬爲四明船  
場後七十有餘年某適以倉氏之職至此問而王兄季  
和亦來作景迂官相與訪問舊蹟尙猶可考偶成數語  
東季和并呈叔晦其詩有日鄞江舊有船司空小江晚  
望江之東竭來海頭四閱月塵埃滿袖生稊穰是大愚  
初至明之作其時慈湖方參佐浙西帥府幕廣平教授  
徽州繁齋以德粹同年進上尉江陰獨叔晦以國學正  
家居故遠還者不及三君其遊候濤山記曰壬寅之冬  
遂緣海東距海六十里友人番端叔主定海簿相約偕  
遊求粟今年夏四月端叔因謝子揚自臨安至會於太  
白節山之間刻日康炳道兄弟會於王季和家李叔潤  
方居徽史間叔楊希度偕行舒元英亦與其徒諸葛生  
來東萊卒於辛丑大愚以壬寅冬之官正合期喪服滿  
之期元英則廣平弟也其題慈谿龍虎軒詩云年來世  
路轉蹉跎正大中庸論愈多出本無心歸亦好何須習  
次白于戈似屬大愚將去明之作然則本傳所謂終更  
赴銓者乃監倉大愚別有新命而非謂期喪之闕蒙上  
文而言之也況大愚之赴銓也本傳言平園方爲丞相  
招之不往宰輔表平園自西樞入中書在淳熙丁未春

二月而朱子答大愚書有曰對班在何時今日既難說話而疎遠尤難且只收斂人主心念是第一義題注在丁未冬十一月是大愚之赴任以壬寅其去官以丁未首尾六年若德粹成進士卽束萊卒之歲釋褐尉鄞者五年始遷鄂州教授則及見大愚矣

楊簡字敬仲慈谿人受業於陸九淵學者稱慈湖先生嘗

寓史氏碧沚講學

宋史及鮪埼亭集

汪義端嘗任四明郡僚事無佞隨惟狗公議史浩嘗薦之稱其好學不倦有爲善心云

節舉真隱漫錄

又吳做字益恭南渡

時詩人嘗爲鄞尉

宋詩鈔傳

黃震字東發慈谿人累官浙東提舉遷宗正少卿不拜震有別業在日湖德祐初避地同谷不復入城市城中圖籍器物盡爲人取去勿問也日惟一食仰天長歌祈速死震

爲人清介自守時陸學盛傳震獨崇朱學及卒門人私謚

曰文潔先生謝翱至而上嘗訪之同谷寓室翱字臯羽福

州長谿人爲文天祥客宋亡隱避有高節遊歷嘗至四明

其晞髮集中如見月食呈王應麟翠鎖亭避雨過舒臨海

宅送袁太初歸剡諸詩皆在鄞作也

宋史兼采延祐志及宋濂謝翱傳晞髮集

安劉汴人居鄞之小溪以詩義魁多士善清言三歷秘丞

郎官素爲賈相客每以科目自持然卒不能顯用

清客居士集

胡三省字身之台州寧海人至元二十一年至鄞訪袁洪

城南明年畱袁氏塾三省嘗釋通鑑幾三十年亂後三失

其稿至是日手抄定注始成完書凡五年寇作以書藏窖

中得免

清客居士集

元

戴表元字帥初奉化州人咸淳中官建康教授同郡袁洪時通判建康朝夕互還往表元貧洪每周之轉國子主簿遭德祐之變避兵走鄰郡明年兵定歸里寓居於鄞授徒賣文以活老稚洪命其子桷師之表元先避兵天台與舒岳祥劉正仲二人相倡和其後二人皆授徒於鄞岳祥字舜侯臨海人學者稱閩風先生正仲字樛園天台人表元稱其逢人傾肺肝者集中言正仲今年鄞城之約不就則正仲寓鄞已非一日也

袁桷師友淵源錄及剡源集

曹說字習之定海人粹中四世孫以父孝先死李全之難絕葷酒婚宦終歲寓居僧舍後學問難壘壘不倦酬答生

平無喜愠嘗曰絕人我則天理自著學者尊爲泰宇居士

戴表元寓鄞與倡和有同曹泰宇賦寶化鳳花詩及再寄

曹居士詩

延祐志兼  
采剡源集

張炎字叔夏一字玉田杭州錢唐人俊之五世孫也元初  
來鄞設卜肆其歸也袁梅爲募錢疏戴表元送張叔夏西  
遊序略曰叔夏嘗以藝北遊不遇南歸愈不遇猶家錢唐  
十年久之又去東遊山陰四明天台間若少遇者旣又棄  
之西歸於是余周流授徒適與相值問叔夏何以去來道  
途若是叔夏曰吾之來本投所賢賢者貧依所知知者死  
雖少有遇而無以寧吾居吾不得已而違之豈樂爲此哉  
語竟意色不能無阻然少焉飲酣氣張取平生所自爲樂

府自歌之噫嗚宛抑流麗清暢不惟高情曠度不可藝企

而一時聽之亦能令人忘去窮達得喪所在矣

據剡源清容二集

葛慶龍南康人寓居四明僧舍精唐律詩酒酣能飛筆爲

數百言然棄不復錄有什一集極精整

清容居士集

黃潛字晉卿婺州義烏人官應奉翰林嘗三至鄞主王厚

孫家

鄭真遂初老人傳

樊天民失其名象山人與長銓卓宜之讀書青山時劉潛

齋居青山袁士元設教湖上相與徜徉山水間以詩酒自

娛者十有餘年同時台州陸德陽溫州張天秩噸縣梁公

輔皆詩人流寓於鄞

書林外集

案宜之潛齋並不知其名宜之嘗爲山長檢舊志

山長但有卓瑛或宜之名瑛也象山志以天民爲  
樊餘慶則年代懸殊知非一人矣

廼賢字易之南陽人隨其兄宦遊江浙卜居於鄞再至京  
師以能文名尤長歌詩每一篇出士大夫輒傳誦時浙人  
韓與玉能書王子充善古文人目爲江東三絕久之歸浙  
東辟爲東湖書院山長以薦授翰林院編修出參桑哥失  
里軍卒於官

元詩  
選傳

劉仁本字德元天台人歷官江浙省左右司郎中時方谷  
真據慶元招延文士仁本與林彬薩都刺朱右詹鼎輩咸  
依之而仁本尤爲親近谷真海運輸燕仁本實司其事朱  
右羽庭詩稿序云侯以經濟之才當艱厄之運爲國家安

輯海隅以通運道是也

明詩人  
小傳

張憲字思廉會稽山陰人嘗仕張士誠張亡遁入四明山  
變姓名爲佛家奴常攜一冊自隨臥則以之藉首一夕死

於寺中發而讀之乃玉笥集也其詩始行於世

四明  
山志

吳志淳字主一無爲州人元末知靖安都昌二縣奏除待

制翰林爲權倖所阻避兵於鄞

明史趙  
搗謙傳

志淳草隸著名詩

亦雅正晚賦遣懷詩云爲儒已入他州籍垂老頻收故國

書誦之淒然增淪落之感時會稽胡舜咨盛景華天台毛

彞仲錢唐楊彥常臨安劉庸道永嘉柴養吾豐城揭伯防

魏郡邊魯生輩皆先後寄迹於鄞或賦詩或作文或論書

法各逞所長詞章翰墨人爭得之養吾師米南宮寫雲山



煙嵐變滅渾然天成魯生亦善寫水墨花鳥樹石成化志及明詩

綜

戴良字叔能婺州浦江人學古文於黃潛柳貫吳萊學詩於余闕元末以薦授淮南儒學提舉時事不靖無可行其志乃浮海之中州欲交其豪傑卒無所遇遂南還至正二十六年至鄞寓居者六年徙慈谿時亦往來郡中其在鄞所作詩文別編爲鄞游稿九靈山房集

丁鶴年西域人厲志爲學清苦自將避地越江上浙東廉訪僉事都堅不花將薦入館閣卽宵遁從兄吉雅謨丁謫遷江右鶴年從之後還越宿留四明或旅食海鄉爲童子師或寄居僧舍賣藥自給雖久處艱瘁泊如也時兵戎四

起鶴年逃匿海島轉徙無常大抵皆明州境內當方氏之盛幕府頗待士士之至者踵接鶴年獨遠巡遠避門無一迹非其食不食非其衣不衣重然諾尙氣節嘗自謂曰凡爲清士當以廉爲主義爲輔和爲衛三者備庶可免於今之世矣

戴良高士傳

明

高明字則成溫州瑞安人或曰平陽人至正中官浙東閩幕都事四明獄囚多寃明平反允當人稱神明辟丞相掾方谷真叛省臣以明溫人知海濱事擇以自從與幕府論事不合谷真就撫欲畱置幕下卽日解官寓於鄞之櫟社沈氏感劉克莊死後是非誰管得滿村爭唱蔡中郎之句

作琵琶記明太祖聞其名召之以老疾辭使者取記上帝  
覽畢曰五經四書在民間譬之五穀此記乃珍羞之屬俎  
豆間亦不可少後抱病還鄉卒於寧海

嘉靖志及明  
詩人小傳

案蔣仲舒堯山堂外紀謂撰記者乃高棅其字則  
成別是一人朱彝尊據涵虛子曲譜有高棅而無  
高明疑仲舒或有所據然亦疑而未定也

瞿佑字宗吉杭州錢唐人士少從父寓鄞學詩於王厚孫一  
日章彥復自福建檢校回杭過鄞飲佑家佑適學舍歸彥  
復卽指席間雞爲題令賦大加稱賞手寫桂花一枝并題  
詩以贈有瞿君有子早能詩之句佑時年十四云

歸田  
詩話

國朝

包爾庚字長明松江上海人故明羅定守也蕭散出塵文亦如其爲人順治二年航海至鄞寓焉江上召之不赴久之歸里

續者舊傳

余畚字生生眉州青神人以世襲錦衣家京師明亡挈眷南下出入諸幕府或云嘗以郡曹監軍或云嘗官通判順治二年至鄞寓居湖上二十餘年陸宇燦觀日堂七子之集畚蒞其盟已而出遊倦甚復歸鄞一日題人扇上曰四明余畚全吾騏諧之曰是所謂此間樂不思蜀者耶畚爲之流涕乃署所居曰借鑑樓善飲醉後卽罵座工書亦以醉後益奇晚年復出遊竟以客死

續者舊傳

方授字子畱安慶桐城人明亡狂走方外順治四年至鄞

求畸士友之與華夏王家勤諸人游參與其事五君子之  
難幸得免則傾囊拯諸人之急明年諸人皆死授亦念母  
歸省與於英霍山寨之謀遭名捕盡破其家九年復來鄞  
寓湖上陸字燦兄弟思哀資爲買田令奉母居鄞明年自  
天門山遊石浦嘔血不起

續者  
舊傳

梁以樟字公狄順天清苑人明商邱知縣也兄以楠字仲  
木明經順治四年以楠遊鄞交諸畸士歸告以樟後三年  
以樟來寓居城東與萬秦林時躍徐鳳垣高斗權斗魁兄  
弟李鄴嗣沈士穎倡和稱鶴林八子其在鄞凡三年而去  
去後二年以楠復來未幾兄弟相繼卒又有閩人林日宣  
者字君言亂後來鄞時躍爲序其詩亦畸士

續者  
舊傳

宋龍字子猶太倉崇明人張采之高弟也錢肅樂稱其與

崑山歸莊足相伯仲明亡泛海至翁州爲閣部張肯堂客

課肯堂之孫茂滋順治八年肯堂一門就義獨畱茂滋出

走龍重趼至鄞求全茂滋陸宇燦輩方謀掾茂滋遂共成

之館於陸氏之湖樓茂滋旣出龍返崇明已無家可歸矣

又有江子雲者徽州休寧人寓鄞城西與宇燦讀書後從

肅樂起事事去家居宇燦欲葬王翊子雲爲計收翊頭語

在宇燦傳

續舊傳

范兆芝字香谷定海人順治三年爲亂兵縛去逃入空山

七日不食且死故人周義士掾之明年十月與於甬上五

君子之禍僅而得免又三年又爲山寨所連蓋五年中八

徙而家凡三破乃定居於鄞鄞士陸宇燦輩以兆芝至大喜於是育七子之集兆芝雖甚困然見義必爲張肯堂之孫茂滋既出獄將歸華亭兆芝爲親送往因與汝應元謀其家事應元者故肯堂將事去爲補陀僧挺身請葬閣部者也兆芝既歸益寔授徒罍湖之上後以謀葬父遊粵中

卒

續者舊傳

周維祚一名上竹字雪山揚州人順治八年至鄞時毛聚奎與吳岳生管道復倪元楷汪應詔爲詩社維祚與焉自署曰東楚狂客晚年歸里

續者舊傳

萬曰吉字允康黃州黃岡人明崑山知縣順治十年至鄞高斗樞林時躍林時對萬泰高字泰皆與爲刎頸交倡和

無虛日已而欲之白下同人筮之不吉請無往不可卒死

於楊崑之難

續書舊傳

李國標字君龍奉化人績學敦行由明經知湖廣嘉禾縣流賊方訖不得有所爲在官八十餘日投劾歸明亡杜門著書已而山寨大起遷居郡城東十年事定始還奉化沈麟生字丹綬江南宣城人隱居浮屠寓鄞最久每歲一至高宇泰南湖九子之集每設一席以待寓公之有高節者

國標麟生皆豫焉

續書舊傳

馮京第字躋仲慈谿人都御史元颺之從子也師劉宗周黃道周與復社諸名士相切劘盛有名元颺撫津門有祥子嶺却敵功京第豫有勞莊烈帝錄之未及用而北都亡



乃入閩已而與失職之徒結寨四明山中順治七年寨破

死之

續書  
舊傳

魏耕原名璧字楚白慈谿人明亡棄諸生狂走湖海間蓋  
畸士也張煌言在林門耕乃數至鄞有歸甬東詩後以海

上蠟書事被難

續書  
舊傳

周西字方人定海衛人居蘆江年二十餘棄舉業奉母寓  
鄞之寶林學者多從之遊順治十六年海師大掠郡東鄞  
西奉母逃山中猝遇盜盜見西母豐碩以爲富家嫗用火  
薰之求金西抱母大慟撲滅其火乞身代盜揮戈斫西右  
手將指幾殊刃一卒口孝子也舍之乃得免既久寓寶林  
挈家來依諸生間出遊多耿耿不合仍歸寶林西於易書

詩禮春秋孟子皆有圖解史漢皆有論說唐宋杜韓諸大家皆有抄所稱勁草諸編者也晚年移寓入城卒

續者舊傳

黃宗羲字太冲紹興餘姚人與萬泰陸符同學於劉宗周

寓鄞最久一時名賢多從之陳氏雲在樓其講學處也弟

宗炎字晦木宗會字澤望並負異才先後寓鄞

結埼亭集

鄭梁字禹梅慈谿人以戶部郎知高州府梁學於黃宗羲

嘗寓鄞宗羲亟稱之

曹志

姜炳璋字石貞象山人乾隆初以授經客鄞善說毛詩人

有匡鼎解頤之目其毛詩讀序補義一書在鄞時作也史

榮全祖望皆甬上名宿炳璋與之遊而於榮倡和尤勤後

爲石泉知縣未幾乞歸乃客鄞前後凡二十餘年

行

羅有高字臺三寧都瑞金人於儒宗明道象山於羣經主  
古注小學主說文皆參稽義訓句櫛字比歸於一是爲文  
章絕去摹擬依傍有通曲暢務抒其所獨契乾隆四十年  
客鄞主同年生邵洪家鄞士請業者無不足其意而去明  
年渡海禮浴位山還遊蘇州歲餘復客鄞未幾歸瑞金甫

天  
文  
卒

三  
年

鄞縣志卷十八終